

## Protocol

dalla seduta dil cussegl da vischnaunca,  
venderdis, ils 14 da fevrer 2025: allas 20<sup>00</sup> – 22<sup>15</sup>  
Liug: Stanza da sedutas Cumiera, Center Fontauna

---

Presidi: Adrian Flepp

Actuar: Romeo Schmed, Administraziun communal

Presents:

- |                            |  |   |
|----------------------------|--|---|
| a) Cussegl                 | Silvia Bucheli-<br>Caduff<br>Theres Burri<br>Gadola Felicia<br>Deflorin<br>Adrian Flepp<br>Placi Flury<br>Remo Huonder | Admir Jasarevic<br>Christian Loretz<br>Lucas Lutz<br>Rafael Maissen<br>Alfred Spescha<br>Ignaz Venzin |
| perstgisas                 | Silvio Candinas<br>Otmar Flepp   | Giusep Lozza  |
| b) Suprastonza<br>communal | René Epp<br>Clemens Berther<br>Wendelin Jacomet  | Jris Lombris<br>Paul Flurin Schmidt   |
| c) Cumissiun da<br>gestiun | Silvan Manetsch  |   |
| d) Direcziun<br>communal   | Roland Cajacob, meinafatschenta<br>Simon Cathomen, selvicultur   |   |
| e) Hosps                   | 10 personas  |   |

## Plaid d'avertura dil president:

Il tema dad oz ei staus omnipresents las davosas jamnas ellas gasettas, ellas medias socialas, el radio, gie dapertut. Tgei tema ei pia aschi interessants per nus, ch'il telefonin scalina bunamein el tact da minutas cun novitads? Duront leger las novitads sedamondel: Ei quei propi l'endretga via, ni tut mo acziuns da PR? Ei setracta d'ina singula persuna cun ina tenuta, ch'jeu saiel buca s'accordar. Navenda l'entschatta ha el propgau ed empermess il blau dil tschiel. Skizzau ils plaids cun plein color. Bia facts vegnidas manipuladas per cuntentar persunas e contonscher las atgnas finamiras. Ei vegn detg mansegnas, senza risguard sin persunas, relaziuns ni instituziuns.

Sch'jeu descrivel ina tala persuna ad in program cun intelligenza artificiala, ei il resultat tgunsch in um cun fatscha colorada brina, cavels blonds e cravatta cotschna.

Igl um ha duront sia campagna empermess differentas caussas, denter auter da sminuir la carschia naven da igl emprem di d'uffeci e procurar ch'ils ovs ellas stizuns ein puspei pagabels per la populaziun. Denton ei il cuntrari succediu. Dapi l'entschatta da siu temps d'uffeci, pia ils 20 da schaner, ei il prezi per 12 ovs carschius per pli u meins 5 dollars. Ulteriur da quei introducescha el duanas supplementaras sin bia products digl exteriur. Ed era quei caschuna ch'ils products cuostan dapli e la carschia crescha vinavon. Il davos la populaziun che pitescha. Silpli tard uss duess mintgin haver in maletg avon ils egls. Mo tgei sai jeu mez prender ord quei?

Impurtont ei da star sincers e buca empermetter da quei ch'ins sa buca tener. Fetg jeu buca quei, vilentel jeu miu visavi. Era acceptar las factas e trer endretgas consequenzas ordlunder ei fetg impurtont. Ina comunicaziun transparenta ed ina sincenra collaboraziun ei il fundament per il futur. Ed in bien fundament resista era encunter pli fermas scurladas.

En quei senn giavischel a nus tuts sinceras e transparentas sedutas.

## Mortoris:

Dapi la davosa seduta dil cussegl da vischnaunca ha ei dau suandonts mortoris :

- Giusep Columbin Manetsch, naschius ils 18-07-1953 e morts ils 16-12-2024
- Vera Carigiet-Benesová, naschida ils 20-03-1973 e morta ils 05-01-2025
- Peter Beirne, naschius ils 20-06-1942 e morts ils 06-01-2025 (morts ella Gronda Britannia)
- Diana Moreira Dias, naschida ils 30-05-2023 e morta ils 27-01-2025

## Naschientschas:

Dapi la davosa seduta dil cussegl da vischnaunca ha ei dau ina naschientscha:

- Mattiu Schmidt, naschius ils 02-02-2025, fegl dad Anita e Paul Schmidt-Huonder, Segnas

## Tractandas:

1. Protocol dalla seduta costitutiva dil cussegl da vischnaunca 2025/2028
2. Approbaziun dil reglament "Uorden da fatschentas per la suprastanza communal e per l'organisaziun operativa" (messadi 01-2025/2028)
3. Cumissiun da finanzas – elecziun da cusseglier(a)s (messadi 02-2025/2028)
4. Indrez fotovoltaic areal da scola Mustér - Project e credit (messadi 03-2025/2028)
5. Ura da damondas (conform ad art. 44 dil regulativ da fatschentas)

Il president dil cussegl da vischnaunca Adrian Flepp fa la proposta da far suandontas amplificaziun dalla gliesta da tractandas :

1. Protocol dalla seduta costitutiva dil cussegl da vischnaunca, protocol 01-2025/2028 dils 10 da schaner 2025 e protocol 36 – 2021/2024 dils 6 da december 2024.
2. Elecziun d'in neiv commember per la cumissiun da baghegiar 2025/2028
3. Approbaziun dil reglament "Uorden da fatschentas per la suprastanza communal e per l'organisaziun operativa" (messadi 01-2025/2028)
4. Cumissiun da finanzas – elecziun da cusseglier(a)s (messadi 02-2025/2028)
5. Indrez fotovoltaic areal da scola Mustér - Project e credit (messadi 03-2025/2028)
6. Ura da damondas (conform ad art. 44 dil regulativ da fatschentas)

## *Decisiun:*

*Il cussegl da vischnaunca approbescha unanimamein la gliesta da tractandas amplificada.*

Cussegl da vischnaunca Disentis/Mustér

Adrian Flepp  
president

Romeo Schmed  
actuar

## 1. Protocols

Protocol dalla seduta costitutiva dil cussegl da vischnaunca 2025/2028, protocol 01-2025/2028 dils 10 da schaner 2025

*Decisiun:*

*Il protocol dalla seduta costitutiva dil cussegl da vischnaunca 2025/2028, protocol 01-2025/2028 dils 10 da schaner 2025 vegn approbaus unanimamein.*

Protocol 36 dil cussegl da vischnaunca – 2021/2024 dils 6 da december 2024

*Decisiun:*

*Il protocol 36 – 2021/2024 dalla seduta dil cussegl da vischnaunca dils 6 da december 2024 vegn medemamein approbaus unanimamein.*

Cussegl da vischnaunca Disentis/Mustér

Adrian Flepp  
president

Romeo Schmed  
actuar

## 2. Elecziun d'in neiv commember per la cumissiun da baghegiar

A caschun dalla seduta constitutiva dil cussegl da vischnaunca dils 10 da schaner 2025 ei vegniu reelegiu sut tractanda 4.6 la cumissiun da baghegiar. Cun quei termin era denton aunc in dils quater posts dalla cumissiun da baghegiar vacants, aschia ch'il cussegl da vischnaunca ha buca saviu eleger ina cumissiun da baghegiar cumpleta. El fratemp eis ei reussiu d'anflar in candidat per il post vacant. La suprastanza communal propona d'eleger Daniel Cavaleiro dad Acletta, naschius ils 13-12-1991, menader automaziun tier l'energia alpina, sco neiv commember dalla cumissiun da baghegiar per il rest dalla perioda d'uffeci 2025/2028.

### *Decisiun:*

*Daniel Cavaleiro vegn elegius unanimamein dil cussegl da vischnaunca sco commember dalla cumissiun da baghegiar per il rest dalla perioda d'uffeci 2025/2028.*

Cussegl da vischnaunca Disentis/Mustér

Adrian Flepp  
president

Romeo Schmed  
actuar

### 3. Approbaziun dil reglament "Uorden da fatschentas per la suprastanza communal e per l'organisaziun operativa"

(messadi 01-2025/2028)

#### Presentaziun

Suprastanza, president communal René Epp:

Il president communal presenta cuort il messadi 01-2025/2028 e las ponderaziuns dalla suprastanza communal leutier.

Ei suonda la debatta d'entrada

Cussegl da vischnaunca: Vul metter in artechel egl uorden da fatschenta per la suprastanza communal e per l'organisaziun operativa ch'oblighescha da risguardar il commerci indigen tier tut las cumpras da material, surdadas da lavur, incaricas e survetschs dalla vischnaunca.

Suprastanza communal: Aschia ina regulaziun cunterfar alla lescha dil marcau naziunal (Binnenmarktgesetz) e sa aschia buca vegnir reglada egl uorden da fatschentas. Ins sa sulettamein prender en ina recumandaziun da risguardar il commerci indigen denton negin obligaziun.

Cussegl da vischnaunca: Damonda sch'ins hagi era schau cusseglar il biro extern pertuccont metter si igl uorden da fatschentas per la suprastanza communal e per l'organisaziun operativa.

Suprastanza communal: Explichescha ch'ins hagi adina giu contact culla Curia sco era cun giurists externs per secusseglar en caussa. Aschia ha quei biro era giu investa egl uorden da fatschentas. La basa per igl uorden da fatschentas ei stada il reglament da direcziun che la vischnaunca da Mustér haveva entochen ussa.

Cussegl da vischnaunca: Damonda sche tut las persunas pertuccadas seigien informadas avunda co las decisiuns han da vegnir documentadas egl avegnir.

Suprastanza communal: Il credo ei dad evitar egl avegnir aschi bia fomalissem sco pusseivel ed era evitar tut las sedutas ch'ei buca necessarias. Las decisiuns che survargan il preventiv ston en mintga cass vegnir documentadas. Era tier las decisiuns enteifer il preventiv dat ei la pusseivladad da documentar quellas, leu nua ch'ei fa senn. En tgei fuorma che las decisiuns ston vegnir documentadas vegn aunc definiu exact entras la suprastanza communal.

Cussegl da vischnaunca: Damonda sche quei niev sistem dat buca dapli lavur als caus da departament. La direcziun era gie vegnida scaffida ord il motiv da saver discargar la suprastanza communal.

Suprastanza communal: Ils caus da departament ein ussa bia pli flexibels e san decider ensemen cun ils menaders da sparta (cader) bia pli spert e senza ch'ei drova aunc ina seduta cun pinar tier tractandas eav. Era han ils caus dils departaments la pusseivladad da delegar engiuviars certas incaricas.

Cussegl da vischnaunca: Beneventa il niev sistem politic e da simplificar tut quei ch'ei pusseivel.

Cussegl da vischnaunca: Damonda pertuccont igl artechel 14 che regla la cumissiun da baghegiar. Sto la cumissiun da baghegiar prender en mintga cass senza ina decisiun ni sa ella era delegar la decisiun alla suprastanza communal.

Suprastonza communal: Il president dalla cumissiun da baghegiar ha da tut temps la pusseivladad da dar vinavon ina fatschenta ni l'otra alla suprastonza communal per schar decider.

Ei suonda la deliberaziun en detagl

**Proposta** da cusseglier Christian Loretz: Metter en sut art. 16 egl uorden da fatschentas ch'il commerci indigen sto vegnir risguardadas tier expensas da tut gener dalla vischnaunca.

**Proposta** da cussegliera Theres Burri Gadola: Metter egl uorden da fatschentas ina declaronza da risguardar las fatschentas indigenas ton sco pusseivel tier expensas da tut gener entras la vischnaunca. Quella declaronza duess vegnir egl uorden da fatschentas sco formulaziun generala sco preambel e buca reglada en in artechel.

Cusseglier Christian Loretz retila sia proposta e sa sustener la proposta da concussegliera Theres Burri Gadola.

**Decisiun:**

Il cussegl da vischnaunca accepta unanimamein la proposta da cussegliera Theres Burri Gadola.

Il text che vegn integraus egl uorden da fatschentas secloma sco suonda:

*Preambel*

*Quest uorden da fatschenta regla las cumpetenzas finanzialas e las responsablads dallas differentas instanzas dall'organisaziun da vischnaunca en connex cun il menaschi operativ. Leutier audan era surdadas da lavurs, cumpra da material, incaricas per survetschs eav. Ils responsabels dils departaments ed ils menaders da sparta e partiziun vegnan en quei connex tenor pusseivladad a risguardar tier expensas da tut gener il commerci indigen, aschilunsch ch'ei dat cheutras buca ina sfalsificaziun da concorrenza.*

**Proposta** da cussegliera Felicia Deflorin: Metter en sut art. 14 a) (cumissiun da baghegiar) il suandont text:

*Davart protestas decida la cumissiun da baghegiar. Ella sa delegar la decisiun davart protestas alla suprastonza communal*

Suprastonza communal: Sa s'accordar cun quella proposta.

**Decisiun:**

Il cussegl da vischnaunca accepta unanimamein la proposta da cussegliera Felicia Deflorin.

**Proposta** cussegliera Silvia Bucheli-Caduff: Remplazzar sut igl artechel 17 al 1, 2, 3, 4 e 5c) (regulaziun da suttascriver) la formulaziun sco suonda:

*"Correspondenza semplia" remplazzar cun "Correspondenza senza vigur legala e senza consequenzas finanzialas"*

Suprastonza communal: Sa era s'accordar cun quella proposta.

*Decisiun:*

Il cussegl da vischnaunca accepta unanimamein la proposta da cussegliera Silvia Bucheli-Caduff.

*Decisiuns:*

*Sin fundament dallas ponderaziuns suranumnadas decida il cussegl da vischnaunca unanimamein:*

- 1. dad approbar il reglament «Uorden da fatschentas per la suprastonza communal e per l'organisaziun operativa» cun metter en vigur quel pigl emprem da mars 2025.*
- 2. d'abolir il «Reglament per la direcziun communal», revedius la davosa gada il december 2021, pigl emprem da mars 2025.*
- 3. d'integrar el reglament «Uorden da fatschentas per la suprastonza communal e per l'organisaziun operativa» las propostas approbadas dil cussegl da vischnaunca sco era la preambel formulada dalla suprastonza communal.*

Cussegl da vischnaunca Disentis/Mustér

Adrian Flepp  
president

Romeo Schmed  
actuar

#### 4. Cumissiun da finanzas – elecziun da cusseglier(a)s

(messadi 02-2025/2028)

##### Presentaziun

Suprastonza, president communal René Epp:

Il president communal presenta cuort il messadi 02-2025/2028 e las ponderaziuns dalla suprastonza communal leutier.

Tier quella tractanda drova ei negina debatta d'entrada.

Ei suonda la deliberaziun en detagl

Cussegl da vischnaunca: Damonda sche quella cumissiun ei predelibrona e sa prender senza decisiuns per simplificar la procedura pertuccont la tractaziun dil preventiv. La finamira ei che la procedura vegn era cheu simplificada.

Suprastonza communal: La cumissiun sa buca predelibrar il preventiv. Ella sa denton dar giu in pareri als ulteriurs commembers dil cussegl da vischnaunca per che lez sappi prender sia decisiun pli speditiva.

Cussegl da vischnaunca: Damonda sch'il cussegl savess survegnir ils documents dil preventiv mintgamai pli bauld per haver avunda temps da prender investa en tut ils detagls dil preventiv.

Suprastonza communal: Ils termins ein gia fixai e la suprastonza ha aschia buca la pusseivladad dar ora avon il preventiv al cussegl da vischnaunca. La cumissiun da finanzas sa denton dar vinavon informaziuns als cussegliers ch'ei buca commembers da quella cumissiun.

Sco candidat(a)s per la cumissiun da finanzas vegnan proponi:

- Silvia Bucheli-Caduff
- Remo Huonder
- Admir Jasarevic
- Christian Loretz

Ei suonda l'elecziun dalla candidata e dils 3 candidats en globo.

##### Decisiuns:

*Sin fundament dallas ponderaziuns suranumnadas elegia il cussegl da vischnaunca unanimamein Silvia Bucheli-Caduff, Remo Huonder, Admir Jasarevic e Christian Loretz ella cumissiun da finanzas per la tractaziun dil preventiv 2026:*

Cussegl da vischnaunca Disentis/Mustér

Adrian Flepp  
president

Romeo Schmed  
actuar

## 5. Indrez fotovoltaic areal da scola Mustér - Project e credit

(messadi 03-2025/2028)

### Presentaziun

Suprastonza, gerau Wendelin Jacomet:

Gerau Wendelin Jacomet presenta cuort il messadi 03-2025/2028 e las ponderaziuns dalla suprastonza communal leutier.

Ei suonda la debatta d'entrada

Cussegl da vischnaunca: Damonda sch'igl ei era previu d'installar in indrez per saver cargar autos electric.

Suprastonza communal: El mument eis ei buca previu dad installar in tal indrez. Quei sa denton da tut temps vegnir priu suenter. Il tal indrez ei lu denton mo pusseivels sin ils parcadis sut la halla Cons.

Cussegl da vischnaunca: Damonda daco che mo ina fatschenta ha inoltrau in'offerta.

Suprastonza communal: Informescha ch'igl ei effectiv vegniu inoltrau mo in'offerta. En tut ein tschun fatschentas vegnidadas envidadas dad offerir quellas lavurs.

Cussegl da vischnaunca: Damonda sch'igl ei previu da better giu la neiv dils tetgs en cass ch'ei dat in unviern criu cun bia neiv.

Suprastonza communal: Informescha ch'igl ei buca previu da better giu la neiv giu dils tetgs.

Cussegl da vischnaunca: Damonda sch'igl ei previu da vender a tiarzas personas l'energia che vegn producida.

Suprastonza communal: Informescha che la Repower SA vegn a prender giu quella energia. La Repower SA ei el mument aunc vida luvrar ora in concept per vender quell'energia.

Cussegl da vischnaunca: Il prezi per quels indrezs corrispunda al prezi actual ed ei giustifiaus. Quellas investiziuns vegnan beneventadas ed ei vegn fatg la proposta dad entrar ella fatschenta ed approbar quella.

### Decisiuns:

*Sin fundament dallas ponderaziuns suranumnadas decida il cussegl da vischnaunca unanimamein:*

1. *d'approbar il project per l'installaziun d'in indrez fotovoltaic sin igl areal Scola Mustér.*
2. *da conceder per quei intent in credit net da frs. 205'000.-- cun suttametter quel al referendum facultativ conform ad art. 21 lit. c dalla costituziun communal.*

Cussegl da vischnaunca Disentis/Mustér

Adrian Flepp

Romeo Schmed

## 6. Ura da damondas

Duas damondas a scret ein vegnidas inoltradas. René Epp prelegia las damondas e rispunda ellas sco suonda:

### *Emprema damonda:*

L' ovra solara ella Val Nalps ha l' Axpo decidu da baghegiar. En quei connex ha RTR fatg ina intervesta cul president communal da Tujetsch. Martin Cavegn ha menziunau ch'ei hagi duvrau da tuttas vischnauncas da concessiun il consentiment per quei project perquei che quel vegn realisau sin terren da concessiun.

Mia damonda concreta ei co ei quei reglau sch'ei dat in retuorn a tschep tier l' ORA, sauda igl implont da PV era tier?

Vegn l'energia producida cun quella era dabien procentualmein allas vischnauncas da concessiun sco energia da concessiun?

### *Risposta president communal René Epp:*

Sin l'alp Nalps ei previu da realisar ina gronda ovra solara alpina. Quei stabiliment vegn realisau sin terren ch'ei en possess dall'ovra electrica Rein Anterior SA (KVR). Aschia vegn la nova ovra solara tgunsch ad esser igl onn 2048 ina part dil retuorn a tschep (Heimfall). Tut ils acziunaris (sper las vischnauncas concessiunaras era il cantun Grischun) han cun ina declaronza confirmau ch'ins conceda ils dretgs per quei stabiliment sur il temps dalla concessiun ora. Concret entochen 2090, cun l'opziun da prolungir 2 gadas per 5 onns. Aschia duei la segirtad da dretg per la nova societad solara entochen 2090 vegnir garantida.

Il tscheins pil dretg da baghegiar ei vegnius definius sin frs. 60'000 annual per la KVR. Da quella summa survegnan las vischnauncas concessiunaras naven da quei mument ch'igl ei clar ch'ella vegn realisada, prevedentamein igl onn 2025, mintg'onn in'indemnisaziun da 20'000 directamein en cassa communal. La repartiziun dils frs. 20'000 duei succeder tenor cumpart dil capital d'acziun.

Per la vischnaunca da Mustér munta quell'indemnisaziun annuala cun ina participaziun da 1.37% a frs. 3'227.33.

### *Secunda damonda:*

Co vesa ei ora cun il traffic public. Han las autoritads cantunalas/federalas dau ina risposta?

### *Risposta president communal René Epp:*

Ils 2 da settember 2022 ha il Cussegl Grond approbau la nova lescha dil traffic public el cantun Grischun. Sin basa da quella nova lescha ha la vischnaunca schau elaborar ina fatschenta specialisada in niev concept che corrispunda allas intenziuns dalla nova lescha, la quala garantescha fetg aultas contribuziuns. Cun l'entschatta schaner 2025 ei vegniu inoltrau ulteriura corrispondenza agl uffeci correspondent cun la supplica da survegnir ton pli spert ina risposta. Gest en connex cun il niev urari bia pli attractiv per la Regiun Surselva che va en vigur cun miez december 2025 ei quei fetg impurtont. Aschia sa vegnir cumbinai nies bus cun la nova purschida d'in tact da mes'ura ella Surselva.

En vesta ch'jeu haiel survegniu inoltrau la damonda da Rafael Maissen ad uras eisi gartegiau da survegnir ina risposta uffiziala dil chef digl uffeci cumpetent en vesta da nossa seduta da questa sera, la quala secloma sco suonda:

«Vielen Dank für Ihre Mail. Bis am Freitagabend werden wir leider noch keine verbindliche Rückmeldung geben können.

Unser fachlicher Lösungsvorschlag wird aktuell zwischen AEV (Amt für Energie und Verkehr) und DIEM (Departement für Infrastruktur, Energie und Mobilität) besprochen. Wir sind uns

kantonsintern, aber einig, dass ein ganzjähriges Ortsbusangebot für Disentis per Dezember 2025 zur Abnahme des Halbstundentakts sehr wichtig ist.

Der Kanton plant per Dezember 2025 einen ganzjährigen Halbstundentakt im Korridor Chur - Ilanz - Disentis - Dieni anzubieten. Dabei soll im Teilabschnitt Ilanz - Disentis - Dieni der heutige Stundentakt auf der Bahn mit einem entsprechenden Busangebot zum Halbstundentakt verdichtet werden. Der detaillierte Fahrplanentwurf soll am 23.05.2025 publiziert werden. Aktuell ist die Gemeinde Disentis im intensiven Kontakt mit dem Kanton und mit PostAuto bezüglich der Erweiterung des Ortsbusangebots auf diesen Zeitpunkt. Wir gehen heute davon aus, dass wir bis im Frühling mehr Klarheit haben und bitten Sie um entsprechende Geduld.»

#### *Tiarza damonda (scola populara):*

Risposta en num dil cussegl da scola

- Ils 24 da schaner 2025 ha ei dau ina situaziun da prighel potential sil scalem superiur.
- Sin fundament da differents indezis ha la meinascola alarmau la polizia.
- La situaziun malguessa saveva la meinascola buca responsar.
- Ei settractava dad ina mesira preventiva.
- Ei deva negin prighel acut.
- Il scolar pertuccaus ha survegniu igl agid e sustegn necessari ed ha ferton saviu returnar en scola.
- Davart famas prendin nus buca posiziun, independentamein dil fatg, sch'ellas ein veras ni buc.
- Sco responsabels per la scola havein nus l'incumbensa da menar la scola tenor meglier saver e puder. Quei fagein nus cun tut quei ch'ei necessari e pusseivel leutier ed adina cun la savida, che nus essan responsabels per il beinstar da rodund 200 scolars ed il personal da scola.
- Sche nus duvrein agid, sustegn ni cussegl lu involvein nus las instanzas responsablas adina sche pusseivel a moda preventiva.

Il cussegl da scola ei suttamess alla discreziun d'uffeci sco era al schurmetg da datas. Da pli gronda impurtonza ei denton da salvar la discreziun da mintga singul affon e garantir da tut temps ad els in clima da fidonza e beinvuglientscha.

Theres Burri Gadola engrazia a geraua Jris Lombris per las informaziuns claras e transparentas en connex culs eveniments dils 24 da schaner 2025 en scola. Sco cussegliera eis ella cuntenza cun l'informaziun, sco mumma buca: Ils geniturs han buca survegniu las informaziuns, che il cussegl da vischnaunca ha ussa grad udiu. Theres Burri Gadola supplichescha geraua Jris Lombris da mirar, ch'ìls geniturs retscheivan las medemas informaziuns sco il cussegl da vischnaunca.

#### *Quarta damonda (sentupada cun la giuventetgna):*

Sco invitaziun ei vegniu publicau pliras gadas el FUS la sentupada, plinavon ha l'administraziun tarmess varga 160 invitaziuns personalas per posta. Deplorablamein havein nus survegniu mo 3 annunzias e quei dils novs votants.

La suprastonza communal reponderescha ussa la damonda co integrar nos giuvenils en fatgs politics.

## Communicaziuns


Neginas communicaziuns.

La proxima seduta dil cussegl da vischnaunca ha liug mesjamna, ils 26 da mars 2025 el Center Fontauna.

Cussegl da vischnaunca Disentis/Mustér  
Il president: Igl actuar:



Adrian Flepp



Romeo Schmed

Disentis/Mustér, ils 21 da fevrer 2025